

司馬文正公傳家集

卷十六至卷二十一

同治元年正月

同治元年正月

司馬文正公傳家集卷第十六

後學桂林陳弘謀重訂

制詔

殿前都指揮使節度使加宣徽南院使制

限二百字

以上成

國家選果毅之材以守衛中禁委謹信之士以敷揚大猷自非忠力冠倫識略高世折衝厭難外可以任牙爪之官諭志布和內可以受腹心之寄則何以克叶民望無曠天工在茲詳求固匪輕授爰發休命誕告明廷具官某心通武經材應時用以禮樂慈愛為制勝之本以智信仁勇為和衆之資蓋孫吳而不為慕方召而自任

疑爾深念則物莫能窺截然長驅則敵不及避是以錫之六纛總此八屯士皆知方國以增重嘉其扈從之久積是勤勞之多宜峻寵名以昭丕績俾奉宣於美德庶敦懋於膚公永念厥艱必有以稱於戲竭股肱之效所以報恩榮罄夙夜之勤所以熙職業典聽朕必無棄爾成

翰林學士禮部侍郎除三司使制

限一百五十字以上成

朕荷天地之貺施承祖宗之慶靈四方無虞萬物咸遂而公私之積尚未豐衍歲小不登民有菜色豈朕所以嫗煦撫循之未至將有司奉揚宣布之未稱與何其設心之勤而收效之寡也以爾具官某性質之美得於自

然而發揮於文追琢於學多士之秀無爾爲先雖禁林
清塗秩宗美仕居之積久譽望已優而古之進賢必試
以事財賦之任於今爲急求稱其職僉曰汝能是用命
汝典茲邦計汝其勿以金穀爲末而不恤勿以簿領爲
煩而不爲九功所歌八政所重登平之業將汝乎取之

誠勵舉人敦修行檢詔

限二百字
以上成

孔子稱德成而上藝成而下故爲四科以第門人而文
學處末然則爲士者文有餘而德不足斯而已矣奚足
尚哉國家憲章前古詳延俊乂敷奏以言明試以功何
嘗不勤求敦忠屏斥浮僞列于庶位得人已多尚慮有
司教導之方不皆盡善登進之法有所未精是以士或

背本追末弃實取華不知從學所以立身爲文所以行遠而謂能離章辨句則百行可遺非屬辭比事則六經無用習尚成俗安恬不非此豈聖人所以立教之心而朕所以待賢之志哉自今天下之士其務以道德爲師仁義爲友進之於內而讓之於外治之於身而施之於人才雖美不敢以自驕善未至不敢以自怠如是則窮居閭閻何病乎不達苟異於是朕無取焉仍敕有司明諭中外使咸稱朕意

賜宰臣韓琦乞退第一表不允批答

朕以寡薄少承基緒未及究明師保之訓更閱事物之變而遽失先帝之大庇膺四海之重任怵惕危懼若涉

巨川踐于春冰實賴耆耄不二心之臣朝夕左右同力
協義用濟于艱難夫選賢任能廣叅同異何損於政設
官分職論列得失亦維其常至於天時數沴蓋以警誨
朕躬非專輔弼而卿遽自咎責抗章辭位是重朕之不
德也卿其體茲眷倚之志專精致思廣裕厥心博采嘉
謨以輔不逮

賜新除知樞密院事陳升之辭免恩命不允斷
來章詔

敕升之省所奏劄子今樞密院使副四員無容其閒更
置一知院事旣非舊典驟增員數當無事時四方聞之
得無驚動耳目伏望聖慈如臣前所請若大明府永興

軍已除用人即且乞授臣陳穎一郡事具悉卿志氣安
裕明智自將屢更邊藩嘗佐樞府出牧于外迨今暮年
朕惟汝思俾復舊職宜夙夜竭力以副所期尚爾固辭
殊失朕意夫登用賢雋憂在不多咨詢大猷患在不博
設官隨世何必故常今邊境雖安而不虞當戒亟踐乃
位毋違朕言所乞宜不允仍斷來奏故茲詔示想宜知
悉

賜資政殿大學士戶部侍郎知青州吳奎乞就
差知兗州不允詔

敕吳奎省所奏乞就差知兗州貴便頤養事具悉卿朝
廷舊臣踐歷二府忠厚彊直簡在朕心海岱之區土沃

民庶風聲氣俗卿所習知雖宿疾未平而事務無廢式
是重望底綏一方當體至懷未容辭避所乞宜不允

賜文武百寮曾公亮已下上第三表乞上尊號
不允斷來請批答

省表具之朕荷祖宗之重寄元元困窮未獲厥所夙夜
悼懼如涉春冰屬以報本之禮不敢隨曠故躬執犧牲
祇見上帝固非昭告成功自營福祿也而羣公卿士猥
見褒譽欲歸以溢美增其徽稱抗章勤請至于再三朕
乏馨香之德不能媚于神祇乃甲申地震淫雨爲災天
威彰著日虞罪悔尚何盛烈之可述鴻名之敢當心焉
愧惕流汗霑足況尚在諒闇哀素未忘何宜此時亟舉

盛典若斯之議非所敢聞宜體予至誠勿復爲奏所請
宜不允仍斷來請

賜新除知樞密院事陳升之上第一表辭恩命
不允斷來章批答

省表具之股肱之臣佐佑帝室樞機之職訏謨廟堂自
非僉諧曷敢輕授卿歷事三世克有一心事效已明時
望攸屬膺茲圖任夫復何辭所辭宜不允仍斷來章

賜宰臣曾公亮不允批答

朕以不德災及元元地震冀方隄防橫潰流離壓覆靡
所底居朕夙夜震懼不忘于心實賴祖考所遺耆儁之
臣佐佑輔翼濟于艱難今乃遽自引咎抗章辭位朕何

望焉卿其專精致思勉脩職業以裨不逮所請宜不允
賜觀文殿學士新除兵部尚書知青州歐陽脩

詔

敕歐陽脩省所劄子奏准樞密院遞到誥敕授臣兵部
尚書依前觀文殿學士知青州伏念臣近以疾病累乞
致仕未賜俞允欲望且守舊任冀得將理衰殘卿服采
三朝佐佑大政朕惟東表之地事任至重自非宗工莫
可付委况旅力未衰嘉猷克壯宜念王事勿復有辭所
乞宜不允可便受告敕發赴本任

除文彥博

門下雖天子必有尊所以嚴事上之訓唯聖人能饗帝

所以昭報本之誠朕祇紹丕基肇稱元祀禮文旣備慶
賜誕敷眷惟心膺之臣幹是機衡之任共膺神貺宜處
衆先推忠協謀崇仁同德贊治守正保運亮節佐理翊
戴功臣樞密使劔南西川節度管內觀察處置橋道等
使開府儀同三司守司空檢校太師兼侍中兼羣牧制
置使行成都尹上柱國潞國公食邑一萬六千二百戶
食實封六千三百戶文彥博道茂國華才推人傑體忠
厚以居德壯謀猷而奮庸弼亮三朝周旋二紀再司魁
柄仍冠中樞仗鉞臨戎則兇渠折首秉鈞調化則黎獻
承風內外荐更望實彌劭矧在纂承之際親聞顧託之
言委寄至隆眷注爲重協贊盛儀之舉克臻熙事之成

是用進美號以褒功取閒田而增邑併伸異數式示優
恩於戲慮危於安所以綏萬國懷遠以義所以靖四夷
益懋乃官用副朕志可特授依前守司空檢校太師兼
侍中兼羣牧制置使行成都尹潞國公充樞密使劔南
西川節度管內觀察處置橋道等使加食邑一千戶食
實封四百戶仍賜推忠協謀崇仁同德贊治守正保運
亮節佐理翊戴功臣散官勲如故主者施行

除皇弟頽

門下立愛惟親治由近始因心則友化自上行朕合太
宮逆釐后帝百神受職四海推恩矧孝弟之至隆宜寵
章之光被皇弟山南西道節度管內觀察處置橋道等

使光祿大夫檢校太尉同中書門下平章事與元尹上
柱國高密郡王食邑一千七百戶食實封六百戶顏溫
良異稟聰達夙成勝衣彤信厚之風佩韞負老成之志
孝友之性不強而安德義之經未言而喻甫當就學亦
旣疏封予所撫憐同氣異息迨盛儀之具舉方渙澤之
誕敷錫加號以記功進崇階而敘位仍加井賦益重藩
維於戲寵而不驕以謙恭爲之本滿而不溢以節儉爲
之先汝其念哉無替朕命可特授特進依前檢校太尉
同中書門下平章事與元尹高密郡王充山南西道節
度管内觀察處置橋道等使加食邑七百戶仍賜崇仁
保運功臣勲食實封如故主者施行

除皇伯祖承顯

門下朕惇宗盛禮祇適先猷茂對三靈駿奔億醜臣工
顯相后帝居歆嘉與親賢共膺戩穀皇伯祖昭化軍節
度金州管内觀察處置等使金紫光祿大夫檢校工部
尚書使持節金州諸軍事金州刺史兼御史大夫上柱
國康國公食邑五千八百戶食實封一千八百戶承顯
治躬齋栗養志粹和挺宗室之令儀藹公侯之淑問地
隆磐石任重藩垣春秋寢高學問不倦被服儒素蘊河
間之雅材琢磨箴規蹈衛武之美德助我茲祀協于多
儀是用進功伐之名益陪敦之賦仍加真食併示徽恩
於戲懷德維寧昔王之明訓爲善最樂前哲之徽猷勉

思高滿之危勿忘臨履之戒可特授依前檢校工部尚書使持節金州諸軍事金州刺史兼御史大夫康國公充昭化軍節度金州管內觀察處置等使加食邑七百戶食實封三百戶賜推誠保順功臣散官勲如故主者施行

除郝質

朕順考古道率由舊章三歲一郊四海大賚乃眷爪牙之士實惟心膂之臣宜渙茂恩以均景貺亮節保順功臣殿前都指揮使安武軍節度冀州管內觀察處置等使光祿大夫檢校尚書左僕射使持節冀州諸軍事冀州刺史兼御史大夫上柱國天水郡開國公食邑三千

一百戶食實封七百戶郝質溫恭不犯沈毅有謀敢決
應北方之強閑暇得晉國之勇仁能附衆忠以發身內
總七萃之師外分十連之任訓兵肅給騶御習於義方
逢時安平戎狄仰其威信屬是齋祠之謹復兼扈從之
勞不有旌褒曷昭倚注論功加等益地從隆考諸僉諧
允爲宜稱於戲竭誠盡節所以享安榮徇公忘私所以
報寵祿往服休命汝其懋哉可特授依前檢校尚書左
僕射使持節冀州諸軍事冀州刺史兼御史大夫充殿
前都指揮使安武軍節度冀州管内觀察處置等使加
食邑七百戶食實封三百戶仍賜亮節保順翊戴功臣
散官勲封如故主者施行